

**L I G J**  
**Nr.9150, datë 30.10.2003**

**PËR URDHRIN E FARMACISTËVE NË REPUBLIKËN E SHQIPËRISË**  
*(Ndryshuar me ligjin nr. 128/2014, datë 2.10.2014)*

*(i përditësuar)*

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

**K U V E N D I**  
**I REPUBLIKËS SË SHQIPËRISË**

**V E N D O S I:**

**KREU I**  
**DISPOZITA TË PËRGJITHSHME**

Neni 1

*(Ndryshuar fjalë në pikën 2 me ligjin nr. 128/2014, datë 2.10.2014)*

1. Për ruajtjen e cilësisë së lartë të shërbimit farmaceutik dhe për zbatimin e rregullave të moralit e të etikës profesionale farmaceutike, krijohet Urdhri i Farmacistëve.

2. Urdhri i Farmacistëve është ent publik jobuxhetor, i cili përbëhet nga individët, që ushtrojnë profesionin e farmacistit në Republikën e Shqipërisë dhe përfaqëson interesat e tyre profesionale në nivel partneriteti institucional.

Neni 2

1. Urdhri i Farmacistëve ka për mision ruajtjen dhe garantimin e nivelit të lartë të formimit dhe edukimit shkencor e profesional të farmacistëve, ushtrimin e profesionit, sipas kërkesave shkencore, normave të etikës mjekësore e të Kodit të Deontologjisë Farmaceutike Shqiptare dhe mbrojtjen e pacientëve e të konsumatorëve nga kequshtrimet profesionale dhe shkeljet e normave të detyrueshme.

2. Në përmbushje të këtij misioni, Urdhri i Farmacistëve:

a) bën regjistrimin e farmacistëve në një regjistër të veçantë;

b) mbikëqyr zbatimin e detyrave profesionale, në përputhje me kërkesat e shkencave farmaceutike dhe të legjislacionit farmaceutik;

c) bashkëpunon me institucionet arsimore e shkencore për hartimin dhe planifikimin e programeve të formimit shkencor, të specializimit pasuniversitar dhe të kualifikimit të vazhdueshëm të farmacistëve;

ç) mbikëqyr zbatimin e kërkesave të Kodit të Deontologjisë Farmaceutike Shqiptare, në mbrojtje të interesave të pacientëve dhe të konsumatorëve;

d) jep dhe heq të drejtën vetjake për ushtrimin e këtij profesioni.

Neni 3

*(Shtuar pika 3 me ligjin nr. 128/2014, datë 2.10.2014)*

1. Urdhri i Farmacistëve mbikëqyr respektimin e të drejtave dhe detyrave të personave, që ushtrojnë profesionin e farmacistit në Republikën e Shqipërisë, sipas rregullave të Kodit të

Deontologjisë Farmaceutike Shqiptare, për mbrojtjen e popullatës nga kequshtrimi i profesionit dhe cenimet e etikës farmaceutike, si dhe nga veprime të tjera që privojnë kujdesin e nevojshëm farmaceutik.

2. Urdhri i Farmacistëve mbron farmacistët nga veprimet arbitrare të administratës publike ose private për ushtrimin e profesionit.

3. Urdhri i Farmacistëve garanton që anëtarët e Urdhrit përmbushin detyrimet e programit të ricertifikimit të vendosur nga institucioni përkatës.

#### Neni 4

1. Anëtarë të Urdhrit të Farmacistëve bëhen individët, shtetas shqiptarë, të diplomuar farmacistë në Republikën e Shqipërisë ose jashtë saj, që pranojnë Kodin Deontologjik Farmaceutik Shqiptar dhe që e ushtrojnë këtë profesion në sektorin e prodhimit farmaceutik, të shërbimit dhe të shpërndarjes farmaceutike, ambulator e spitalor, publik dhe privat, ose në sektorë të tjerë të shëndetësisë.

2. Përfshihen nga ky detyrim, por jo nga e drejta e anëtarësimit në Urdhrin e Farmacistëve, farmacistët funksionarë të administratës publike, për sa kohë që ata nuk ushtrojnë veprimtari të mirëfilltë profesionale farmaceutike.

#### Neni 5

Shtetasit e huaj, për ushtrimin e profesionit të farmacistit në sektorin farmaceutik të Republikës së Shqipërisë, janë të detyruar të anëtarësohen në Urdhrin e Farmacistëve, të njohin dhe të zbatojnë Kodin e Deontologjisë Farmaceutike Shqiptare, si dhe të gjitha aktet ligjore e nënligjore që rregullojnë shërbimin farmaceutik dhe atë shëndetësor në Republikën e Shqipërisë.

#### Neni 6

1. Asnjë individ nuk mund ta ushtrojë profesionin e farmacistit në Republikën e Shqipërisë, pa qenë anëtar i Urdhrit të Farmacistëve.

2. Punëdhënësit në institucionet a ndërmarrjet shtetërore ose publike dhe në subjektet private ndalohen t'i punësojnë ata në kundërshtim me këtë dispozitë.

3. Këshilli Kombëtar i Urdhrit të Farmacistëve përcakton kriteret për pranimin e farmacistëve në këtë urdhër.

#### Neni 7

*(Ndryshuar me ligjin nr. 128/2014, datë 2.10.2014)*

1. Urdhri i Farmacistëve, gjatë kryerjes së detyrave, mban lidhje të vazhdueshme, nëpërmjet përfaqësimit ndërinstitucional, me ministrinë përgjegjëse për shëndetësinë, me institucionet e saj vartëse si dhe me ministritë e tjera, me institucionet qendrore dhe organizma të tjerë publikë ose jopublikë, të krijuar sipas legjislacionit në fuqi.

2. Urdhri i Farmacistëve informon çdo 6 muaj ministrinë përgjegjëse për shëndetësinë lidhur me anëtarësimet, gjykimet disiplinore dhe probleme të tjera me interes të ndërsjellë. Ky informacion publikohet edhe në faqen e internetit të Urdhrit.

3. Ministria përgjegjëse për shëndetësinë bashkëpunon me Urdhrin e Farmacistëve për hartimin e projektligjeve dhe të dokumenteve të rëndësishme në fushën farmaceutike.

## Neni 8

1. Urdhri i Farmacistëve ka buxhetin e vet, të cilin e administrojnë në përputhje me rregullat financiare në fuqi.
2. Burimet financiare të Urdhrit të Farmacistëve janë:
  - a) kuotizacionet e anëtarëve;
  - b) tarifatat e regjistrimit dhe të dhënies së të drejtës vetjake për ushtrimin e profesionit;
  - c) donacionet e ndryshme vendase dhe të huaja dhe të ardhura të tjera të ligjshme.
3. Të ardhurat e realizuara gjatë ushtrimit të veprimtarisë së vet, Urdhri i Farmacistëve i përdor për të përmbushur misionin e caktuar me këtë ligj.

## KREU II ORGANIZIMI DHE DREJTIMI

### Neni 9

*(Shfuqizuar shkronja "ç", shtuar shkronja "d" e pikës 1, shtuar pika 2 me ligjin nr. 128/2014, datë 2.10.2014)*

1. Organet kryesore të Urdhrit të Farmacistëve janë:
  - a) asambltetë;
  - b) këshillat;
  - c) komisionet disiplinore;
  - ç) Komisioni i Regjistrimit dhe i Dhënies së të Drejtës së Ushtrimit të Profesionit.
2. Zgjedhjet në organet e përmendura në pikën 1 të këtij neni duhet të sigurojnë përfaqësim në masën 30 për qind për çdo gjini, në përputhje me ligjin nr. 9970, datë 24.7.2008, "Për barazinë gjinore në shoqëri".

### Neni 9/1

#### **Presidentët e Urdhrit**

*(Shtuar me ligjin nr. 128/2014, datë 2.10.2014)*

1. Presidentët e Urdhrit zgjidhen me votim të fshehtë nga Këshilli Kombëtar dhe ai rajonal midis jo më pak se 2 kandidaturave alternative.
2. Këshilli Kombëtar zgjedh Presidentin e Urdhrit të Farmacistëve me shumicën e votave të të gjithë anëtarëve të tij. Mandati i presidentit është 5 vjet, me të drejtë rizgjedhjeje vetëm njëherë.
3. Këshillat rajonale zgjedhin presidentët përkatës të këshillave rajonale. Mandati i tyre është 5 vjet, me të drejtë rizgjedhjeje vetëm një herë.
4. Kandidaturat për presidentë të Urdhrit të Farmacistëve duhet të përmbushin këto kritere:
  - a) të jenë jo më shumë se në moshën e daljes në pension në momentin e zgjedhjes;
  - b) të kenë jo më pak se 15 vjet eksperiencë në profesion;
  - c) të kenë përvojë dhe të dhëna të besueshme për aftësi komunikimi, organizimi e

drejtimi;

ç) të mos jenë marrë ndaj tyre masa ndëshkimore disiplinore në 5 vitet e fundit;  
d) të mos jenë të dënuar me vendim të formës së prerë për kryerjen e një krimi apo për kryerjen e një kundërvajtjeje penale me dashje.

5. Funksioni i presidentëve të Urdhrit të Farmacistëve është i papajtueshëm me çdo funksion tjetër administrativ, shtetëror apo politik.

#### Neni 10

*(Ndryshuar fjalia e dytë dhe e pestë e pikës 2, zëvendësuar emërtim me ligjin nr. 128/2014, datë 2.10.2014)*

1. Asambleja Kombëtare përbëhet nga anëtarët e këshillave rajonalë.
2. Asambleja Kombëtare zgjedh Këshillin Kombëtar. Zgjedhjet për anëtarë të Këshillit Kombëtar bëhen çdo 5 vjet, me të drejtën e një rizgjedhjeje. Asambleja rajonale përbëhet nga tërësia e përfaqësuesve të anëtarëve të Urdhrit të Farmacistëve të qarkut. Asambleja rajonale zgjedh këshillin rajonal. Zgjedhjet në këshillin rajonal bëhen çdo 5 vjet, me të drejtën e një rizgjedhjeje.

#### Neni 11

*(Ndryshuar fjalë në fjalinë e parë dhe shfuqizuar fjalia e dytë e pikës 2, zëvendësuar emërtim me ligjin nr. 128/2014, datë 2.10.2014)*

1. Në Këshillin Kombëtar bëjnë pjesë detyrimisht Presidenti i Urdhrit të Farmacistëve, zëvendësi i tij, presidentët e këshillave rajonalë, si dhe nga një përfaqësues nga Ministria e Shëndetësisë, Instituti i Sigurimit Shëndetësor dhe Fakulteti i Mjekësisë.
2. Asambleja Kombëtare zgjedh Presidentin dhe zëvendësin e tij me një mandat 5-vjeçar, me të drejtën e një rizgjedhjeje.
3. Këshilli Kombëtar emëron dhe shkarkon Sekretarin e Përgjithshëm.
4. Këshilli Kombëtar merr vendime, me shumicë votash, kur janë të pranishëm më shumë se gjysma e anëtarëve të vet.

#### Neni 12

Këshilli Kombëtar i Urdhrit të Farmacistëve harton dhe miraton Kodin e Deontologjisë Farmaceutike, si dhe statutin e Urdhrit të Farmacistëve.

#### Neni 13

Këshilli Kombëtar, në përputhje me misionin e Urdhrit të Farmacistëve, të parashikuar në dispozitat e këtij ligji, ka këto përgjegjësi:

- a) përcakton e miraton strukturën organizative të këshillave rajonalë dhe të Këshillit Kombëtar;
- b) cakton kuotizacionin dhe tarifën e regjistrimit;
- c) administron pasuritë e luajtshme dhe të paluajtshme të Urdhrit të Farmacistëve në nivel kombëtar, duke përcaktuar fondet në administrimin e këshillave rajonalë;
- ç) mbikëqyr të gjitha veprimtaritë dhe administrimin e organeve që varen prej tij;
- d) mbikëqyr dhe ndërhyr në rregullimin e marrëdhënieve të punës së farmacistëve dhe subjekteve të tyre private me Ministrinë e Shëndetësisë dhe Institutin e Sigurimeve të Kujdesit

Shëndetësor.

#### Neni 14

*(Ndryshuar me ligjin nr. 128/2014, datë 2.10.2014)*

1. Këshilli rajonal krijohet në bazë qarku dhe përbëhet nga 5 deri 9 anëtarë në varësi të numrit të anëtarëve të Urdhrit të Infermierit, në qark.
2. Këshilli rajonal zgjedh presidentin dhe zëvendësin e vet.
3. Këshilli rajonal emëron dhe shkarkon sekretarin.

#### Neni 15

Këshilli rajonal, nën mbikëqyrjen e Këshillit Kombëtar, në përmbushjen e misionit të Urdhrit të Farmacistëve, brenda juridiksionit të vet ka këto detyra:

- a) mbikëqyr dhe ndërhyt në rregullimin e marrëdhënieve të punës ndërmjet farmacistëve, subjekteve të ndryshme private farmaceutike dhe atyre ndërinstucionale në sektorin farmaceutik e shëndetësor të qarkut;
- b) administron buxhetin dhe të gjitha pasuritë e Urdhrit të Farmacistëve të qarkut;
- c) zbaton vendimet e Këshillit Kombëtar dhe rregulloret e udhëzimet e hartuara prej tij;
- ç) cakton komisionin e regjistrimit të anëtarëve.

#### Neni 16

*(zëvendësuar emërtim me ligjin nr. 128/2014, datë 2.10.2014)*

1. Pranë Këshillit Kombëtar dhe këshillave rajonale të Urdhrit të Farmacistëve funksionojnë komisionet disiplinore, të cilat caktohen respektivisht nga Asambleja Kombëtare dhe ajo rajonale.
2. Komisionet disiplinore janë organe të gjykimit profesional, të cilat verifikojnë dhe shqyrtojnë ankesat për shkeljet e Kodit të Deontologjisë Farmaceutike, si dhe gabimet teknike të farmacistëve gjatë ushtrimit të profesionit.
3. Komisionet disiplinore, pranë këshillave rajonale, ushtrojnë kompetenca disiplinore të shkallës së parë. Vendimet e tyre janë të apelueshme në komisionin disiplinor të Këshillit Kombëtar, i cili ushtron kompetenca disiplinore të shkallës së dytë.

#### Neni 17

*(Ndryshuar shkronja “c” e pikës 1 me ligjin nr. 128/2014, datë 2.10.2014)*

1. Komisioni disiplinor heton dhe gjykon, në mbështetje të fakteve dhe provave të administruara në seancë dëgjimore. Kur vërteton se anëtari ka kryer shkelje të Kodit të Deontologjisë Farmaceutike ose ka bërë gabime teknike, ai jep njëri nga masat e mëposhtme:
  - a) vërejtje me shkrim;
  - b) vërejtje me paralajmërim;
  - c) gjobë nga 15 000 (pesëmbëdhjetë mijë) lekë deri në 100 000 (njëqind mijë) lekë. Gjobat e vjela sipas shkronjës “c”, të pikës “1”, të këtij neni, derdhen njëqind për qind në Buxhetin e Shtetit;
  - ç) shkarkim nga organet drejtuese të Urdhrit të Farmacistëve dhe heqje të së drejtës për t'u rizgjedhur në këto organe për një periudhë deri në 3 vjet;

- d) përjashtim nga Urdhri i Farmacistëve për një periudhë deri në 3 vjet.
2. Komisioni ka të drejtë t'u caktojë kundërvajtësve, si masë plotësuese, kryerjen e një rikualifikimi në institucionet publike, sipas tarifave të përcaktuara.
3. Masat e mësipërme disiplinore vlerësohen të shlyera, në qoftë se brenda 1 viti nga dita e dhënies së tyre, për shkronjat "a" dhe "b" të këtij neni, dhe brenda 3 vjetëve për shkronjat "c" dhe "d", nuk është marrë ndonjë masë tjetër disiplinore ndaj anëtarit të Urdhrit të Farmacistëve.

#### Neni 18

1. Ankesat kundër vendimeve për marrjen e masave disiplinore nga komisioni disiplinor i këshillit rajonal paraqiten në komisionin disiplinor të Këshillit Kombëtar të Urdhrit të Farmacistëve brenda 30 ditëve nga komunikimi me shkrim i vendimit.
2. Komisioni disiplinor, brenda 30 ditëve nga marrja e ankesës, detyrohet të japë vendimin për ankesën e paraqitur. Vendimi i komisionit disiplinor të Këshillit Kombëtar është përfundimtar.
3. Për masat disiplinore, të parashikuara në shkronjat "c" dhe "d" të nenit 17 të këtij ligji, personi ka të drejtë t'i drejtohet gjykatës brenda 30 ditëve nga data e komunikimit me shkrim të vendimit.

### KREU III DISPOZITA KALIMTARE DHE TË FUNDIT

#### Neni 19

1. Ministri i Shëndetësisë ngarkohet të ngrejë një komision të përkohshëm, i cili duhet të organizojë zgjedhjet e para të këshillave rajonale dhe të Këshillit Kombëtar të Urdhrit të Farmacistëve.
2. Këto zgjedhje të bëhen brenda 3 muajve nga data e hyjes në fuqi të këtij ligji. Me zgjedhjen e Këshillit Kombëtar, komisioni i përkohshëm shkrihet.

#### Neni 20

Urdhri i Farmacistëve financohet nga shteti për një periudhë njëvjeçare. Masa dhe mënyra e këtij financimi përcaktohen me akte nënligjore, të nxjerra nga Këshilli i Ministrave.

#### Neni 21

Çdo dispozitë, që bie në kundërshtim me këtë ligj, shfuqizohet.

#### Neni 22

Ky ligj hyn në fuqi 15 ditë pas botimit në Fletoren Zyrtare.

**Shpallur me dekret nr.4010, datë 18.11.2003 të Presidentit të Republikës së Shqipërisë,  
Alfred Moisiu**